

10 JAN 1999

Kabinet-Bijaksana

BARISAN KABINET BARU BUKTI KEBIJAKSANAAN DR MAHATHIR

LANGKAWI, 10 Jan (Bernama) -- Pergerakan Pemuda Umno Bahagian Langkawi hari ini berkata barisan menteri Kabinet yang baru dilantik merupakan bukti kebijaksanaan Perdana Menteri Datuk Seri Dr Mahathir Mohamad.

Ketuanya Nawawi Haji Ahmad berkata pergerakan itu memberi sokongan yang tidak berbelah bagi terhadap Perdana Menteri di atas kebijaksanaannya melantik Datuk Seri Abdullah Ahmad Badawi sebagai Timbalan Perdana Menteri serta barisan menteri kabinet yang baru.

Katanya pergerakan itu melihat Abdullah sebagai pemimpin sederhana, warak, menghormati orang tua, terkenal di arena politik antarabangsa serta kesetiaan yang tidak berbelah bagi terhadap Umno dan diterima oleh seluruh anggota parti.

Bercakap kepada pemberita di sini, beliau berkata Pemuda Langkawi yakin ketokohan Abdullah boleh mengembalikan keyakinan masyarakat terhadap umno sebagai wadah perjuangan Melayu dan menyelesaikan kegawatan politik dalaman parti.

Nawawi juga berkata Pemuda Umno Langkawi menerima keputusan Perdana Menteri melepaskan jawatan Menteri Kewangan dan Menteri Dalam Negeri dan berpendapat ini akan memberi lebih banyak peluang dan masa kepada Dr Mahathir menangani kegawatan ekonomi dan politik negara.

Pemuda Umno Langkawi juga menyifatkan perlantikan Tun Daim Zainuddin sebagai Menteri Kewangan sebagai keputusan yang tepat dan yakin kebolehan Daim untuk membawa Malaysia keluar dari kemelut kegawatan ekonomi berdasarkan kecemerlangan beliau dalam pentadbiran kewangan yang lalu, tambahnya.

Sementara itu, Persatuan Pengusaha Kedai Bebas Cukai Langkawi yakin dengan barisan anggota kabinet kerajaan yang baru diumumkan Perdana Menteri baru-baru ini, yang disifatkan sebagai mantap, Malaysia akan bersedia menghadapi segala cabaran dalam alaf baru.

Sambil mengucapkan tahniah di atas perlantikan Daim, Pengerusinya Arshad Desa berkata penduduk Langkawi berbangga dengan perlantikan Daim kerana beliau (Daim) yang juga Pengerusi Bersama Lembaga Pembangunan Langkawi (LADA) amat peka dengan perkembangan Langkawi sebagai sebuah destinasi pelancongan.

-- BERNAMA

NH WAT